



MARISOL RAMIREZ / ARGAZKI PRESS

Urdulizko ospitaleak protesta artean ireki ditu ateak

Unai Brea

@unaibrea

Uztailaren 7an hasi ziren gaixoak artatzen Osakidetzak Urdulizen (Bizkaia) ireki duen Alfredo Espinosa ospitale berrian. Erietxeak progresiboki jarriko ditu martxan arlo guztiak, eta 2017ra arte ez ditu zerbitzu guztiak eskainiko. Uribe Kosta eta Uribe Butrore eskualdeetako 175.000 biztanleri emango die arreta, Gurutzetako ospitalearen zama arinduz.

Zentro berriaren kudeaketak kritika ugari eragin du 2010ean eraikitzen hasi zenetik. Hasiera batean Eusko Jaurlaritzak –arteon Patxi López lehendakari zela– iragarri zuen 2013an zabalduko zituztela ospitale berriko ateak, baina irekiera-eguna atzeratuz joan da.

Osakidetzan ordezkariak duten sindikatuek hainbat mobilizazio egin dute ospitalea erabat publikoa izan dadin: “Zerbitzu guztiak Osakidetzako langileek eman behar dituzte, besteak beste sukaldea, garbiketa eta mantenua”, esan zuen LABek uztailaren 1ean, ospitalearen aurrean egindako mobilizazioaren karietara. Egun horretan ospitalearen inaugurazio ekitaldira joandako Iñigo Urkullu lehendakariaren eta Jon Darpon Osasun sailburuaren aurrean bildu

ziren sindikatueta kideak, “Urduliz %100 publiko” bat eskatzeko. Alfredo Espinosaren bigarren “bataioa” izan zen: 2012ko azaroan Patxi Lópezek ere inauguratu zuen.

“Pribatizazioak gainkostua dakar”

“Urtero, Osakidetzak 330 milioi euro gastatzen ditu berezkoak dituen zerbitzuak pribatizatuz; eta garbiketari dago-kionez, hala erabakitzen da edozein pribatizazioak gainkostua dakarrela jakin arren”, dio ELA sindikatuak. Haren iritziz, Urdulizko garbiketa zerbitzua pribatizatzearen ondorioa urtero 100.000 euro gehiago xahutzea litzateke.

“Osakidetzan garbiketa-zerbitzu gehien esleituta daukan enpresa, Garbaldi, Euzkadi Buru Batzarrekoa izandako pertsona batek zuzentzen duela azpimarratu behar da”, salatu izan du ELAk. Josu Olazarán Sagarduy da pertsona hori.

Sindikatuak uste dute Osakidetzak ez duela behar bezala argitu nola kudeatuko diren Urdulizko ospitaleen nahitaezkoak izango diren zenbait zerbitzu. “Bai Osakidetzak berak bai Eusko Jaurlaritzak pribatizazio gehiago egitea galarazten duten akordioak dituzte indarrean, baina Osakidetzak horien gaintik jokatu nahi du”.

EKONOMIAREN TALAIAN

Gure pentsioak, borrokarako jomuga



Juan Mari Arregi

Hego Euskal Herriko pentsiodunak eta Espainiako Estatukoak larrituta daude pentsioen eltzetsuaren likidatze etengabearen aurrean. Espainiako Lan Ministeritzak Erreserba Funtseko 8.700 milioi euro erabili zuen uztailako pentsioak ordaintzeko. Operazio horren ondoren opa-roaldian aurreztutakotik 25.176 milioi euro baino ez dira geratzen. Erritmo horretan, eltzetsua 2017 amaieran hutsik egongo da. 2011n 67.000 milioi euro zeuden bertan. Zer gertatu da egoera horretara iristeko?

Bost milioi lagun daude langabezian Espainian eta Gizarte Segurantzaz kotizatzen dutenak –horiekin ordaintzen dira pentsioak– egunetik egunera gutxiago dira. Ez soilik gutxiago, enplegu prekario eta behin-behinekoren ondorioz soldatak murriztu direnez, kotizatzen dutenek kopuru txikiagoan egiten dute. PPrentz Gobernuak kotizazio tarifa finkoa sustatzen ari da kontratazioa suspertzeko, eta horrela, Gizarte Segurantzarako diru-sarrerak ez dira nahiko.

Egoera horren aurrean eta pentsioak bermatzen segi nahi badugu, prekarietatea errotik desagerrarazi behar dugu eta enplegu duinaren eta egonkorraren alde egin, egungoak baino soldata txukunagoak behar ditugu. Horrez gain, hobeto kudeatu behar da hau guztia. Hego Euskal Herriari, estatutu eta hitzarmenen bidez teorikoki badugu Gizarte Segurantzarako eskuduntzarik. Baina Madrilek konpromiso hori urratzen du eta ez digu uzten esku hartzen. Hortxe beste arrazoi bat nazio subiranotasuna aldarrikatzeko, Gizarte Segurantzaz propioarekin gure pentsioak bermatuko baditugu. Jakina, hemen ere egin ditzakegu gauzak gaizki. Baina kontrol politiko, sindikal eta soziala askoz handiagoa eta hobea litzateke. Borroka egiteko jomuga izan daiteke.